

黔南叢書

第二集第七冊

憶歲丙戌隆夢以選拔應廷試因得遊相國礪堂夫子之門學問文章側聞緒論竊幸仰嶽之高觀海之大雖未能測其實量而景行有在心嚮往之自捧檄南旋不獲復侍几席故吾師勲業赫奕流播宇內髫鬣黃髮皆能言之而如夢之身出其門者轉不能詳且盡則以夫子宦轍所歷凡閩粵秦豫黔蜀吳越莫不各有吟咏垂爲箸作用私憾親炙之日少未嘗窺其萬一耳昨歲來黔與喆孫鷺汀刺史爲寮友重以世好遂稱莫逆因出所藏黔軺紀行集見示是集爲乾隆壬子吾師奉命典

試此邦驛路皇華灑然成韻而於山川古蹟考核精詳

匪徒抽秘騁妍專工藻繪誠有裨於掌故益信吾師經

緯之實學即此已覘其概已夢等備員黔中將周知夫

風土故實勉效尺寸以期無愧官司之職集中若夜郎

考貴州考黔陽竹枝詞諸篇邦之士大夫皆當細繹而

深長思焉第以爲輜軒之韻事乎哉今鷺汀重付梓人

以公同好展誦遺冊慨然念吾師文章學問其播爲雅

頌歌詠太平者國史具存若夫隨所至而記載之編殊

幸得覩斯集而尤賢鷺汀之克承先志也爰敬爲之序

道光庚戌季春受業李隆萼謹撰

黔輶紀行集

黔南叢書第二集

清襄平蔣攸銘箸

乾隆五十七年壬子科直省鄉試四月三十日御試應
開列考官諸臣於正大光明殿是日蒙恩賜茶食及朱
櫻雪梨洵曠典也

晨光橐筆上金鑾鳴盛無能忝素餐五色目迷知學
陋三條燭盡憶恩寬御厨又賜紅綾餽仙果還分赤
玉盤差免倒棚貽衆誚一誠惟矢寸心丹

閏四月二十八日奉命偕錢漆林簡討典試貴州

六千里外記行滕

謂戊申閩南之行

書劍依然歲月增想是

前生多偃蹇每從得意倍凌兢買珠竊恐嗤畱櫝鑑

水寧惟志飲冰門第如君才不愧飛雲巖頂快同登

五月初四日未刻出廣寧門六十里抵良鄉書院新雨

初霽路甚泥濘薄暮始至懸燈後漆林簡討亦至書院

同宿

過盧溝橋

戊申使閩次年奉扶先大夫柩安葬保陽連歲祭掃皆經此迄今凡五年矣

五年五度上盧溝人事無憑水自流早列科名慚負

米再持使節聽鳴騶垂楊攀折情何限宿雨沾塗歲

有秋計日六郎關不遠保陽山下望松楸

初五日行七里宿涿州

初六日行十里經樓桑村即漢昭烈故里又五里爲忠義店路西有漢桓侯張飛故里碑村南有祠又六十里定興縣七十里安肅縣宿

初七日行二十里至荆塘鋪係荆軻故里又五里至漕河慈航寺小憩二十五里保定府城三十五里至郭村有郭隗先生故里碑相傳爲張燕公讀書處又十里宿滿城縣之陘陽驛

初八日行三十五里有光武故城遺蹟又十里望都縣
憩堯母祠祠內有堯母陵及泉源發於平地四時不涸
伯祖嵩臣公爲邑令時修廟碑在焉時縣尙名慶都又
四十五里過清水河未至河有村舍相傳卽陶唐故都
十里定州宿有碑曰中山靖王國

初九日行二十里爲古鮮虞國有堆阜若巨冢相傳以
爲卽中山又五里明月店有聞雞臺或云燕太子丹或
云光武宿此皆不可考又十五里爲宋杜太后故里先
三里經劉禹錫陋室遺蹟又十五里經韓魏公衆春園

有春園畱勝木坊二十里新樂縣五里經伏羲畫卦臺
四十里伏城驛宿先二十里古蓮花店相傳爲伏羲生
處

衆春園

企想中山帥名高畫錦堂忠貞標晚節

公咏菊云爲愛
黃花晚節香

風度領羣芳便欲徵同樂寧惟奏小康胆寒西夏國
原不廢秋霜

畫卦臺

時望雨甚切

憶昔登臺卦畫分靈光猶在溯前聞桀高赤鯉空秋

水樂毅黃金共夕噀千載奇文傳解澤九重勤禱望
需雲何當率土甘霖沛我亦輶車息衆氛

初十日四鼓起程大風涼如深秋曉至正定府南關外
爲漢順平侯趙雲故里有碑行五里過滹沱河時河中
水淺人馬徑渡五十五里欒城縣宿以晉欒武子築城
得名

十一日行二十里新寨店爲李左車故里又二十五里
趙州卽古趙國五里經大石橋漢馮唐故里在焉又十
五里有馮唐墓又二十五里有漢光武斬石人處碑又

十五里柏鄉縣宿

十二日行六十里內邱縣又六十里順德府宿卽晉時

襄國爲石勒所据者

十三日行四十里沙河縣十里有亭名蘇秦亭爲秦激

張儀入秦處又二十五里抵永年縣之臨洛關宿先三

四里許路東有孔門德行冉子神道碑

十四日行三十里土人云此地有黃梁仙蹟卽盧生入

夢處又二十里邯鄲縣城內有呂仙祠行十五里經廉

頗墓三十五里杜村店卽藺相如故里二十里磁州宿

州界漳滏二水之間國朝州牧蔣擢疏滏陽河爲南北
二渠至今彌望稻田兼有芰荷之勝州南道旁叢叢相
望者皆疑塚也

磁州道中四首

清渠夾鏡送征驂蓮葉青青稻葉含遠樹四圍天淡
沱水田飛鷺到江南

綠陰深處見人家茅屋炊烟一縷斜蒲外水風晴亦
雨不須鼓吹藉鳴蛙

芳堤點染白羊蹤風味依然裴晉公大石橋邊故園

景詩情多在釣船中

磁甌野店兩三枝想見紅衣出水時更喜晚來嘗玉屑清芬端是俗人醫

十五日行二十五里過漳河時山水未發河中淤成沙路南北分而爲二俱可徑行又五里豐樂鎮入河南界土人云鎮東十五里有銅雀臺故址行三十五里彰德府宿府爲古鄴城城北有韓魏公畫錦堂遺蹟

十六日行十里有漢鄧禹杖策追光武處木坊又五里魏家營曹瞞屯兵於此又二十里姜河舖卽姜里有文

王演易處碑十五里至湯陰縣謁岳忠武穆祠祠內有
武穆手書墨莊二大字碑五里光村舖相傳爲嵇侍中
血濺帝衣處二十里抵宜溝驛宿係子貢故里

姜里

姜里名何古端因演易傳心源開後聖卦畫契先天
臣節冰霜苦經文日月懸比干遺墓近千載泣風
烟

謁岳忠武穆祠二首

巍峨廟像肅靈光青史勛名付渺茫
畱得忠魂追蜀

帝不將天幸羨蘄王

韓世忠之得全其終如
衛青之不敗由天幸也

九原風

雨悲南渡千載松楸憶北邙若使鑾輿終返正甘心

鳥盡作弓藏

既爲中原生此人安危一髮繫千鈞天心未肯先亡

宋臣罪都緣不帝秦嵇紹衣襟同濺血曲端旂幟倍

愴神南強北勝皆離黍尸祝崇祠歷劫新

十七日行三十五里過淇水橋橋南有淇水二字碑水

聲湯湯甚湍急但無所謂籊籊竹竿者又二十五里抵

淇縣宿縣爲朝歌地有殷三仁祠九十耄勤木坊北關

外有殷墟及淇澳故址二碑南關外有殷三仁故里及殷朝六七賢聖君故都二碑殷人五遷豈皆都此好事者之所爲也

淇水

淇園無復碧交竿竹箭奔流入夏寒有斐常懷君子意不妨便作有筠看

十八日行四十里謁比干祠墓在祠後有宣聖手書殷比干墓四字方碣祠內共七十二碑無元以前者十里抵衛輝府汲縣宿卽牧野地東北有太公泉泉上有廟